



Godina XIV
Ponedjeljak, 2. augusta/kolovoza 2010. godine

Broj/Broj
62

Godina XIV
Ponedjeljak, 2. avgusta 2010. godine

ISSN 1512-7486 - bosanski jezik
ISSN 1512-7494 - hrvatski jezik
ISSN 1512-7508 - srpski jezik

VIJEĆE MINISTARA
BOSNE I HERCEGOVINE

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), člana 7. Zakona o osnivanju Instituta za intelektualno vlasništvo Bosne i Hercegovine ("Službeni glasnik BiH", broj 43/04) i tačke 8.2.4. Strategije razvoja Instituta za intelektualno vlasništvo Bosne i Hercegovine (2008. - 2015.), ("Službeni glasnik BiH", broj 69/09), Vijeće ministara Bosne i Hercegovine, na prijedlog Instituta za intelektualno vlasništvo Bosne i Hercegovine, na 124. sjednici održanoj 10. juna 2010. godine, donijelo je

ODLUKU

O OSNIVANJU VIJEĆA ZA ZAŠTITU PRAVA INTELEKTUALNOG
VLASNIŠTVA

Član 1.
(Predmet Odluke)

Ovom Odlukom osniva se Vijeće za zaštitu prava intelektualnog vlasništva (u daljnjem tekstu: Vijeće) kao savjetodavno-koordinacijski organ Instituta za intelektualno vlasništvo Bosne i Hercegovine (u daljnjem tekstu: Institut).

Član 2.
(Nadležnost)

(1) Vijeće je nadležno za:

- a) Izradu metodologije za prikupljanje informacija o sankcioniranju povreda prava intelektualnog vlasništva u Bosni i Hercegovini od sudova, inspektorata i carine;
- b) Uvođenje sistema za prikupljanje informacija o sankcioniranju povreda prava intelektualnog vlasništva u Bosni i Hercegovini od sudova, inspektorata i carine;
- c) Koncentriranje i analizu informacija o upravnom i sudskom sankcioniranju povreda prava intelektualnog vlasništva u Bosni i Hercegovini radi njihovog objavljivanja u vidu godišnjeg izvještaja;
- d) Analizu iskustava sudova, inspektorata i carine u sankcioniranju povreda prava intelektualnog vlasništva;
- e) Kontaktiranje sa subjektima koji trpe najveću štetu od piratstva i prometa krivotvorenom robom u Bosni i Hercegovini radi prikupljanja sugestija za efikasnije sankcioniranje povreda prava intelektualnog vlasništva;
- f) Praćenje relevantnih godišnjih pregleda procjene raširenosti piratstva i prometa krivotvorenom robom u Bosni i Hercegovini, koje izrađuju međunarodne vladine i nevladine agencije;
- g) Praćenje inicijativa i procesa u svijetu, a posebno u Evropskoj uniji, koji su usmjereni na borbu protiv piratstva i prometa krivotvorenom robom;
- h) Brigu oko usaglašavanja prakse suzbijanja piratstva i prometa krivotvorenom robom u Bosni i Hercegovini s praksom u Evropskoj uniji;
- i) Iniciranje propagandnih akcija usmjerenih na suzbijanje piratstva i prometa krivotvorenom robom.

(2) Vijeće donosi periodični plan i program rada.

Član 3.
(Sastav)

(1) Vijeće se sastoji od 15 članova.

(2) U sastav Vijeća ulaze predstavnici sljedećih institucija, i to:

- a) Instituta za intelektualno vlasništvo Bosne i Hercegovine - 2 predstavnika;

- b) Ministarstva vanjske trgovine i ekonomskih odnosa Bosne i Hercegovine - 1 predstavnik;
- c) Ministarstva pravde Bosne i Hercegovine - 1 predstavnik;
- d) Ministarstva sigurnosti Bosne i Hercegovine - Državne agencije za istrage i zaštitu (SIPA) - 1 predstavnik;
- e) Uprave za indirektno oporezivanje Bosne i Hercegovine -1 predstavnik;
- f) Visokog sudskog i tužilačkog vijeća Bosne i Hercegovine - 1 predstavnik;
- g) Federalne uprave za inspekcijske poslove - inspektorat tržišno-turističke inspekcije - 1 predstavnik;
- h) Republičke uprave za inspekcijske poslove Republike Srpske - 1 predstavnik;
- i) Inspektorata Brčko Distrikta Bosne i Hercegovine - 1 predstavnik;
- j) Federalnog ministarstva pravde - 1 predstavnik;
- k) Ministarstva pravde Republike Srpske - 1 predstavnik;
- l) Ministarstva unutrašnjih poslova Republike Srpske - 1 predstavnik;
- m) Federalnog ministarstva unutrašnjih poslova - 1 predstavnik;
- n) Policije Brčko Distrikta Bosne i Hercegovine - 1 predstavnik.

(3) Stručne i administrativno-tehničke poslove za potrebe Vijeća obavlja sekretar Vijeća koji je zaposlen u Institutu.

Član 4. (Mandat)

- (1) Mandat članova Vijeća traje pet godina.
- (2) Članovi Vijeća mogu biti ponovno imenovani u sastav Vijeća najviše dva puta.

Član 5.
(Konstituirajuća sjednica i poslovnik)

- (1) Konstituirajuću sjednicu Vijeća saziva direktor Instituta.
- (2) Konstituirajuća sjednica se održava najkasnije 60 dana od dana stupanja na snagu ove odluke.
- (3) Vijeće na konstituirajućoj sjednici donosi poslovnik o radu i bira predsjedavajućeg i zamjenika predsjedavajućeg.
- (4) Poslovníkom o radu uređuju se organizacija, način odlučivanja i druga pitanja značajna za rad Vijeća.

Član 6.
(Troškovi)

Troškovi rada članova Vijeća idu na teret institucije koju predstavljaju.

Član 7.
(Stručna i administrativna podrška)

Stručnu i administrativnu podršku Vijeću pruža Institut.

Član 8.
(Stupanje na snagu)

Ova Odluka stupa na snagu osmog dana od dana objavljivanja u "Službenom glasniku BiH".

VM broj 175/10
10. juna 2010. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.